



ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ ՎԱՐՉԱՊԵՏԻ ԱՇԽԱՏԱԿԱԶՄԻ ՂԵԿԱՎԱՐ

0010 ք. Երևան, Կառավարական տուն 1

№ 02/05.31/37666-2024

ՀՀ ԱԶԳԱՅԻՆ ԺՈՂՈՎԻ ԱՇԽԱՏԱԿԱԶՄԻ ՂԵԿԱՎԱՐ-ԳԼԽԱՎՈՐ ՔԱՐՏՈՒՂԱՐ ԴԱՎԻԹ ԱՌԱՔԵԼՅԱՆԻՆ

Հարգելի՛ պարոն Առաքելյան,

Համաձայն «Ազգային ժողովի կանոնակարգ» Հայաստանի Հանրապետության սահմանադրական օրենքի 66-րդ և 77-րդ հոդվածների՝ Ձեզ ենք ներկայացնում՝

1) «Քաղաքացիական կացության ակտերի գրանցման մասին» օրենքում փոփոխություններ և լրացում կատարելու մասին» ՀՀ օրենքի նախագծի և հարակից օրենքների նախագծերի փաթեթի (Պ-933-02.10.2024-ՊԻ-011/0) վերաբերյալ Հայաստանի Հանրապետության կառավարության առաջարկությունը,

2) Հայաստանի Հանրապետության վարչապետի 2024 թվականի նոյեմբերի 4-ի «Հայաստանի Հանրապետության կառավարության ներկայացուցիչ (հարակից զեկուցող) նշանակելու մասին» N 982 - Ա որոշումը:

Հարգանքով՝

ԱՐԱՅԻԿ ՀԱՐՈՒԹՅՈՒՆՅԱՆ

Կատարող՝ Ագնեսա Առաքելյան

Ազգային ժողովի հետ կապերի վարչության ավագ մասնագետ

Հեռ. 515403

Էլ փոստ՝ agnesa.arakelyan@gov.am

ԱՌԱՋԱՐԿՈՒԹՅՈՒՆՆԵՐ

**«ՔԱՂԱՔԱՑԻԱԿԱՆ ԿԱՅՈՒԹՅԱՆ ԱԿՏԵՐԻ ԳՐԱՆՑՄԱՆ ՄԱՍԻՆ» ՕՐԵՆՔՈՒՄ
ՓՈՓՈԽՈՒԹՅՈՒՆՆԵՐ ԵՎ ԼՐԱՑՈՒՄ ԿԱՏԱՐԵԼՈՒ ՄԱՍԻՆ», «ՀԱՅԱՍՏԱՆԻ
ՀԱՆՐԱՊԵՏՈՒԹՅԱՆ ՔԱՂԱՔԱՑՈՒ ԱՆՁՆԱԳՐԻ ՄԱՍԻՆ» ՕՐԵՆՔՈՒՄ
ՓՈՓՈԽՈՒԹՅՈՒՆ ԿԱՏԱՐԵԼՈՒ ՄԱՍԻՆ», «ՆՈՒՅՆԱԿԱՆԱՑՄԱՆ ՔԱՐՏԵՐԻ ՄԱՍԻՆ»
ՕՐԵՆՔՈՒՄ ՓՈՓՈԽՈՒԹՅՈՒՆ ԿԱՏԱՐԵԼՈՒ ՄԱՍԻՆ», «ՀԱՆՐԱԿՐԹՈՒԹՅԱՆ ՄԱՍԻՆ»
ՕՐԵՆՔՈՒՄ ԼՐԱՑՈՒՄՆԵՐ ԿԱՏԱՐԵԼՈՒ ՄԱՍԻՆ» ՕՐԵՆՔՆԵՐԻ ՆԱԽԱԳԾԵՐԻ
ՎԵՐԱԲԵՐՅԱԼ**

««Քաղաքացիական կացության ակտերի գրանցման մասին» օրենքում փոփոխություններ և լրացում կատարելու մասին», ««Հանրակրթության մասին» օրենքում լրացումներ կատարելու մասին», ««Հայաստանի Հանրապետության քաղաքացու անձնագրի մասին» օրենքում փոփոխություն կատարելու մասին», ««Նույնականացման քարտերի մասին» օրենքում փոփոխություն կատարելու մասին» օրենքների նախագծերի փաթեթի (այսուհետ՝ Նախագծերի փաթեթ) վերաբերյալ հայտնում ենք հետևյալը՝

Նախագծերի փաթեթով առաջարկվում է երեխայի ծննդյան ակտային գրանցումից և ծննդյան վկայականից հանել ազգության մասին նշում կատարելու պահանջը, փոխարենն ազգության մասին նշում կատարելը պարտադիր դարձնել անձնագրում և նույնականացման քարտում, ինչպես նաև «Հանրակրթության մասին» օրենքում լրացնել ազգային փոքրամասնությունների հանրակրթական ուսումնական հաստատություն ընդունվելուն առնչվող կարգավորումներ:

Համաձայն հիմնավորման, նորածին երեխայի մոտ իսպառ բացակայում է ազգության վերաբերյալ գիտակցումը, ուստի ազգության մասին իր ծննդյան վկայականում նշում կատարելը հակասում է միջազգային իրավունքի դրույթներին, ինչպես նաև խնդիրներ է առաջացնում առաջին դասարանը համալրելիս այն երեխաների համար, որոնց ծնողներից մեկը հայ չէ, սակայն երեխայի ծննդյան վկայականում ազգությամբ հայ լինելու մասին նշում կատարված լինելու պարագայում վերջինս, միևնույն է, պետք է հաճախի հայերեն ուսուցմամբ դասարան:

Այս առումով հարկ ենք համարում նշել, որ անձը կարող է անձնագիր ստանալ անկախ տարիքից, հետևաբար՝ նաև մինչև 16 տարին լրանալը նրա մոտ ազգության վերաբերյալ գիտակցումը կարող է դեռևս ձևավորված չլինել, ուստի, քանի որ նախագծերի փաթեթին կից ներկայացված հիմնավորմամբ, որպես հիմնական խնդիր ներկայացված է

այն, որ ծննդյան վկայականում և ծննդյան գրանցման ակտում ազգության նշումն իրականացվում է երեխայի մոտ ազգության գիտակցման բացակայության պայմաններում, հայտնում ենք, որ Նախագծերի փաթեթով առաջադրված խնդիրը չի լուծվում:

Ինչ վերաբերվում է հիմնավորմամբ ներկայացված ուսումնական հաստատություն (դպրոց) ընդունելիս առաջացող խնդիրներին՝ հարկ ենք համարում մեջբերել ՀՀ կրթության և գիտության նախարարի 2010 թվականի նոյեմբերի 24-ի թիվ 1640-Ն հրամանի 1-ին կետով հաստատված՝ դպրոցական տարիքի երեխաներին հանրակրթության մեջ ընդգրկելու, սահմանված ժամկետից ուշ հանրակրթության մեջ ընդգրկվող երեխաների կրթության կազմակերպման և հանրակրթական ուսումնական հաստատությունից սովորողին այլ ուսումնական հաստատություն տեղափոխելու և ազատելու կարգի 7-րդ կետը, որով սահմանված է, որ օտարերկրյա քաղաքացիները, երկքաղաքացիները, քաղաքացիություն չունեցող անձինք (նրանց օրինական ներկայացուցիչը), ինչպես նաև այն դեպքում, երբ ծնողներից մեկն է Հայաստանի Հանրապետության քաղաքացի, իրենք են ընտրում իրենց երեխայի ուսուցման լեզուն:

Նկատի ունենալով վերոնշյալ կարգավորումը՝ հայտնում ենք, որ Նախագծերի փաթեթով ներկայացված հնարավոր հարցերը դուրս են օրենքի կարգավորման առարկայում թվարկված հարաբերությունների շրջանակից և առհասարակ չեն հանդիսանում օրենսդրական կարգավորման առարկա: Անհրաժեշտության պարագայում նման փոփոխությունները կարող են կատարվել ենթաօրենսդրական նորմատիվ իրավական ակտերում:

Ելնելով վերոգրյալից՝ գտնում ենք, որ նախագծերի փաթեթով ներկայացված փոփոխություններն առարկայազուրկ են և առաջարկում ենք ներկայացված նախագծերի փաթեթը հանել շրջանառությունից:

ՆԱԽԱԳԻԾ

ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ ՕՐԵՆՔԸ

«ՔԱՂԱՔԱՅԻԱԿԱՆ ԿԱՅՈՒԹՅԱՆ ԱԿՏԵՐԻ ԳՐԱՆՑՄԱՆ ՄԱՍԻՆ» ՕՐԵՆՔՈՒՄ
ՓՈՓՈԽՈՒԹՅՈՒՆՆԵՐ ԵՎ ԼՐԱՅՈՒՄ ԿԱՏԱՐԵԼՈՒ ՄԱՍԻՆ

Հոդված 1. Հոդված 1. «Քաղաքացիական կացության ակտերի գրանցման մասին» 2021 թվականի հունվարի 19-ի ՀՕ-66-Ն օրենքի (այսուհետ՝ Օրենք) 28-րդ հոդվածի 4-րդ մասն ուժը կորցրած ճանաչել:

Հոդված 2. Օրենքը լրացնել հետեւյալ բովանդակությամբ 28.1-ին հոդվածով.

«Հոդված 28.1. Երեխայի ազգության որոշումը

1. Երեխայի ազգությունը որոշվում է ծնողի (ծնողների) ազգությանը համապատասխան, եթե երեխայի ծնողները ունեն միեւնոյն ազգությունը:

2. Երբ ծնողները տարբեր ազգություն ունեն, երեխան իր ազգությունը ընտրում է անձը հաստատող փաստաթուղթ կամ անձնագիր ստանալիս՝ հոր կամ մոր ազգություններին համապատասխան:»:

Հոդված 3. Օրենքի 29-րդ հոդվածի 1-ին մասի 1-ի կետից հանել «, ինչպես նաեւ սույն օրենքով սահմանված կարգով՝ ազգությունը» բառերը:

Հոդված 4. Օրենքի 30-րդ հոդվածի 1-ի մասի 1-ի կետից հանել «, ազգությունը՝ ծննդյան ակտային գրանցմանը համապատասխան» բառերը:

Հոդված 5. Սույն օրենքն ուժի մեջ է մտնում պաշտոնական հրապարակման օրվան հաջորդող տասներորդ օրը:

ՆԱԽԱԳԻԾ

Պ-933¹-02.10.2024-ՊԻ-011/0

ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ ՕՐԵՆՔԸ

«ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ ՔԱՂԱՔԱՅՈՒ ԱՆՁՆԱԳՐԻ ՄԱՍԻՆ» ՕՐԵՆՔՈՒՄ
ՓՈՓՈԽՈՒԹՅՈՒՆ ԵՎ ԼՐԱՅՈՒՄ ԿԱՏԱՐԵԼՈՒ ՄԱՍԻՆ

Հոդված 1. «Հայաստանի Հանրապետության քաղաքացու անձնագրի մասին» 2011 թվականի նոյեմբերի 30-ի ՀՕ-287-Ն օրենքի 5-րդ հոդվածի 2-րդ մասում՝

1) 5-րդ կետից «՝ քաղաքացու կամ սույն օրենքով նախատեսված դեպքերում՝ ներկայացուցչի ցանկությամբ» բառերը հանել.

2) լրացնել հետեւյալ բովանդակությամբ 7-րդ կետ.

«7) մինչեւ 16 տարեկան երեխայի անձնագրում՝ ծնողների մասին տվյալները (անունը, ազգանունը, ազգությունը):»:

Հոդված 2. Սույն օրենքն ուժի մեջ է մտնում պաշտոնական հրապարակմանը հաջորդող օրվանից:

ՆԱԽԱԳԻԾ

Պ-933²-02.10.2024-ՊԻ-011/0

**ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ
ՕՐԵՆՔԸ**

**«ՆՈՒՅՆԱԿԱՆԱՑՄԱՆ ՔԱՐՏԵՐԻ ՄԱՍԻՆ» ՕՐԵՆՔՈՒՄ ՓՈՓՈԽՈՒԹՅՈՒՆ
ԿԱՏԱՐԵԼՈՒ ՄԱՍԻՆ**

Հոդված 1. «Նույնականացման քարտերի մասին» 2011 թվականի նոյեմբերի 30-ի ՀՕ-286-Ն օրենքի 4-րդ հոդվածի 2-րդ մասի 5-րդ կետից «՝ քաղաքացու կամ սույն օրենքով նախատեսված դեպքերում՝ ներկայացուցչի ցանկությամբ» բառերը հանել:

Հոդված 2. Սույն օրենքն ուժի մեջ է մտնում պաշտոնական հրապարակմանը հաջորդող օրվանից:

ՆԱԽԱԳԻԾ

Պ-933³-02.10.2024-ՊԻ-011/0

**ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ
ՕՐԵՆՔԸ**

«ՀԱՆՐԱԿՐԹՈՒԹՅԱՆ ՄԱՍԻՆ» ՕՐԵՆՔՈՒՄ ԼՐԱՑՈՒՄՆԵՐ ԿԱՏԱՐԵԼՈՒ ՄԱՍԻՆ

Հոդված 1. «Հանրակրթության մասին» 2009 թվականի հուլիսի 10-ի ՀՕ-160-Ն օրենքի (այսուհետ՝ Օրենք) 3-րդ հոդվածի 1-ին մասը լրացնել հետևյալ բովանդակությամբ 16-րդ եւ 17-րդ կետերով.

«16) ազգականներ՝ ազգակցական կապի մեջ գտնվող եւ մինչեւ նախապապը կամ նախատատն ընդհանուր նախնիներ ունեցող անձինք: Սույն օրենքի իմաստով՝ անձի հետ ազգակցական կապի 1-ին աստիճանի մեջ են անձի զավակները, ծնողները, քույրերը եւ եղբայրները: Անձի հետ ազգակցական կապի մինչեւ 2-րդ աստիճանի մեջ են ազգակցական կապի 1-ին աստիճանի մեջ գտնվող անձինք, ինչպես նաեւ վերջիններիս հետ ազգակցական կապի 1-ին աստիճանի մեջ գտնվող անձինք: Անձի հետ ազգակցական կապի մինչեւ 3-րդ աստիճանի մեջ են ազգակցական կապի մինչեւ 2-րդ աստիճանի մեջ գտնվող անձինք, ինչպես նաեւ վերջիններիս հետ ազգակցական կապի 1-ին աստիճանի մեջ գտնվող անձինք.

17) մերձավոր ազգական՝ ծնողը, զավակը, որդեգրողը, որդեգրվածը, հարազատ կամ ոչ հարազատ (համահայր կամ համամայր) եղբայրը կամ քույրը, պապը, տատը, թոռը, ամուսինը, ամուսնու ծնողը կամ զավակի ամուսինը:»:

Հոդված 2. Օրենքի 4-րդ հոդվածը լրացնել հետեւյալ բովանդակությամբ 11-րդ, 12-րդ եւ 13-րդ մասերով.

«11. Կրթական հաստատություն ընդունելության դեպքում ազգային փոքրամասնությանը պատկանող սովորողի ծնողը (նրա օրինական ներկայացուցիչը) ունի առաջնային իրավունք ընտրելու իր մանկահասակ երեխաների կրթատեսակը եւ ուսուցման լեզուն:

12. Կրթական հաստատություն ընդունելության դեպքում ազգային փոքրամասնության պատկանելիությունը որոշվում է ելնելով այն հանգամանքից, երբ սովորողի ծնողներից (նրա օրինական ներկայացուցիչներից) առնվազն մեկը ազգային փոքրամասնությանը պատկանող անձ է:

13. Սովորողի ծնողի (նրա օրինական ներկայացուցիչի) ազգային փոքրամասնությանը պատկանելիությունը սահմանել սովորողի ծնողի (նրա օրինական ներկայացուցիչի) նկատմամբ ընտանեկան հարաբերությունների մեջ գտնվող մերձավոր ազգականների եւ ազգականների ազգային պատկանելիության հիման վրա:»:

Հոդված 3. Սույն օրենքն ուժի մեջ է մտնում պաշտոնական հրապարակման օրվան հաջորդող տասներորդ օրը:

ՀԻՄՆԱՎՈՐՈՒՄ

**«ՔԱՂԱՔԱՑԻԱԿԱՆ ԿԱՅՈՒԹՅԱՆ ԱԿՏԵՐԻ ԳՐԱՆՑՄԱՆ ՄԱՍԻՆ»
ՕՐԵՆՔՈՒՄ ՓՈՓՈԽՈՒԹՅՈՒՆՆԵՐ ԵՎ ԼՐԱՑՈՒՄ ԿԱՏԱՐԵԼՈՒ ՄԱՍԻՆ,
«ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ ՔԱՂԱՔԱՑՈՒ ԱՆՁՆԱԳՐԻ ՄԱՍԻՆ» ՕՐԵՆՔՈՒՄ
ՓՈՓՈԽՈՒԹՅՈՒՆ ԿԱՏԱՐԵԼՈՒ ՄԱՍԻՆ, «ՆՈՒՅՆԱԿԱՆԱՑՄԱՆ ՔԱՐՏԵՐԻ ՄԱՍԻՆ»
ՕՐԵՆՔՈՒՄ ՓՈՓՈԽՈՒԹՅՈՒՆ ԿԱՏԱՐԵԼՈՒ ՄԱՍԻՆ, «ՀԱՆՐԱԿՐԹՈՒԹՅԱՆ
ՄԱՍԻՆ» ՕՐԵՆՔՈՒՄ ԼՐԱՑՈՒՄՆԵՐ ԿԱՏԱՐԵԼՈՒ ՄԱՍԻՆ ՕՐԵՆՔՆԵՐԻ
ԸՆԴՈՒՆՄԱՆ**

1. Ընթացիկ իրավիճակը եւ իրավական ակտի ընդունման անհրաժեշտությունը

Մինչեւ 2004 թվականը երեխայի ծննդյան գրանցման ակտի մեջ երեխայի ազգության գրառման համար սյունյակ նախատեսված չի եղել:

Սակայն 2004-2021 թվականներին «Քաղաքացիական կացության ակտերի գրանցման մասին» օրենքում կատարված փոփոխությունների արդյունքում, նաեւ 2021-ին ընդունված «Քաղաքացիական կացության ակտերի գրանցման մասին» օրենքի 28-րդ հոդվածի 4-րդ կետի համաձայն՝ ծննդյան ակտային գրանցման մեջ նշվում է նաեւ երեխայի ազգությունը:

Համաձայն նշված նորմի. «Երեխայի ազգությունը գրառվում է՝

1) ծնողի (ծնողների) ազգությանը համապատասխան, եթե երեխայի ծնողները ունեն միեւնույն ազգությունը.

2) դիմումում նշված ծնողներից մեկի ազգությամբ, եթե երեխայի ծնողները ունեն տարբեր ազգություն:»:

Իսկ օրենքի 30-րդ հոդվածի 1-ի կետի 1-ի ենթակետի համաձայն՝ երեխայի ծննդյան

վկայականում լրացվում է նաեւ ազգության վերաբերյալ տեղեկությունը՝ ծննդյան ակտային գրանցմանը համապատասխան:

Եթե մինչեւ 16 տարեկան երեխայի մոտ ազգության վերաբերյալ գիտակցումը կարող է դեռեւս ձեւավորված չլինել, ապա նորածնի մոտ այն իսպառ բացակայում է:

Հատկանշական է նաեւ այն հանգամանքը, որ 16 տարին լրացած երեխան անձնագիրը ստանալիս կարող է իր ազգությունը նշել ըստ ցանկության, սակայն նորածին երեխային այն պարտադրում են:

Հետեւաբար, երեխայի ծննդի բոլոր ակտերում երեխայի ազգությունը նշելը դառնում է անհմաստ, խախտում է երեխայի իրավունքը, հակասում միջազգային իրավունքի դրույթներին, ըստ որի. «Երեխայի ազգությունը որոշվում է ծնողների ազգությանը համապատասխան: Եթե երեխայի ծնողների ազգությունը տարբեր է, ապա այն որոշվում է երեխայի ցանկությամբ իր հոր կամ մոր ազգությանը համապատասխան՝ նրան անձնագիր կամ անձը հաստատող փաստաթուղթ տրամադրելիս:»:

Առկա իրավական կարգավորումները առօրա կյանքում խնդիրներ են առաջացնում նաեւ առաջին դասարանը համալրելիս այն երեխաների համար, որոնց ծնողներից մեկը ազգությամբ հայ է: Բանն այն է, որ ՀՀ-ում դպրոց ընդունելիս, եթե ծննդյան վկայականում նշված է երեխայի ազգությամբ հայ լինելու հանգամանքը, արդեն իսկ նա պետք է հաճախի հայկական ուսուցմամբ դասարան: Մինչդեռ, Մարդու իրավունքների համընդհանուր հռչակագրի 26-րդ հոդվածի 3-րդ կետի համաձայն՝

«Ծնողներն իրենց մանկահասակ երեխաների համար կրթատեսակ ընտրելու գործում ունեն առաջնության իրավունք:», այսինքն երեխայի ծնողները իրավունք ունեն ընտրելու երեխայի ուսուցման լեզուն:

Նշված դեպքերում ծնողները դիմում են երեխայի ազգությունը փոխելուն՝ որպեսզի օգտվեն իրենց վերոնշյալ իրավունքից, ինչն էլ անհմաստ է դարձնում երեխայի ծննդի բոլոր ակտերում երեխայի ազգությունը նշելը :

2. Առաջարկվող կարգավորման բնույթը

Նախագծերով.

1) Երեխայի ծննդյան ակտային գրանցումից եւ ծննդյան վկայականից հանվում է ազգությունը նշելու պահանջը: Փոխարենը անձի անձնագրում եւ նույնականացման քարտում ազգության մասին նշումը դառնում է պարտադիր:

2) ուժը կորցրած է ճանաչվում օրենքի 28^Ը րդ հոդվածի 4^Ը-րդ մասը՝ դրա փոխարեն նախատեսելով հետեւյալ իրավական կարգավորումը. «Երեխայի ազգությունը որոշվում է ծնողի (ծնողների) ազգությանը համապատասխան, եթե երեխայի ծնողները ունեն միեւնույն ազգությունը:

Երբ ծնողները տարբեր ազգություն ունեն, երեխան իր ազգությունը ընտրում է անձը հաստատող փաստաթուղթ կամ անձնագիր ստանալիս՝ հոր կամ մոր ազգություններին համապատասխան,

3) մինչև 16 տարեկան երեխայի անձնագրում լրացվում են ծնողների մասին տվյալները (անունը, ազգանունը, ազգությունը),

4) ազգային փոքրամասնությանը պատկանող սովորողի ծնողը (նրա օրինական ներկայացուցիչը) առաջնային իրավունք կստանա ընտրելու իր մանկահասակ երեխաների կրթատեսակը եւ ուսուցման լեզուն,

5) սահմանվում են ազգականների եւ մերձավոր ազգականների հասկացությունները:

3. Նախագծի մշակման գործընթացում ներգրավված ինստիտուտները, անձինք եւ նրանց դիրքորոշումը

Նախագիծը մշակվել է ՀՀ ԱԺ «Հայաստան» խմբակցության պատգամավոր Իրինա Գասպարյանի կողմից

4. Ակնկալվող արդյունքը

Նախագծերի ընդունման արդյունքում երեխայի ծննդյան ակտային գրանցումից եւ ծննդյան վկայականից կհանվի ազգությունը նշելու պահանջը: Դրա փոխարեն անձի անձնագրում եւ նույնականացման քարտում ազգության մասին նշումը կդառնա պարտադիր: Դրանով իսկ տարբեր ազգության ծնողներից կազմված ընտանիքները հնարավորություն կունենան իրացնելու երեխաների ուսուցման լեզվի ընտրության իրենց իրավունքը եւ նրանց ուսուցումը կազմակերպելու նախընտրած լեզվով:



ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ ՎԱՐՉԱՊԵՏ

Ո Ր Ո Շ ՈՒ Մ

N 982 - Ա

ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ ԿԱՌԱՎԱՐՈՒԹՅԱՆ
ՆԵՐԿԱՅԱՑՈՒՑԻՉ (ՀԱՐԱԿԻՑ ՉԵԿՈՒՑՈՐ) ՆՇԱՆԱԿԵԼՈՒ ՄԱՍԻՆ

Հիմք ընդունելով «Ազգային ժողովի կանոնակարգ» սահմանադրական օրենքի 66-րդ հոդվածի 2-րդ մասը՝

Հայաստանի Հանրապետության արդարադատության նախարարի պարտականությունները կատարող Արմենուհի Հարությունյանին նշանակել Հայաստանի Հանրապետության Ազգային ժողովում «Քաղաքացիական կացության ակտերի գրանցման մասին» օրենքում փոփոխություններ և լրացում կատարելու մասին», «Հայաստանի Հանրապետության քաղաքացու անձնագրի մասին» օրենքում փոփոխություն և լրացում կատարելու մասին», «Նույնականացման քարտերի մասին» օրենքում փոփոխություն կատարելու մասին», «Հանրակրթության մասին» օրենքում լրացումներ կատարելու մասին» Հայաստանի Հանրապետության օրենքների նախագծերի փաթեթը (Պ-933-02.10.2024-ՊԻ-011/0) քննարկելիս Հայաստանի Հանրապետության կառավարության ներկայացուցիչ (հարակից զեկուցող):

ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ
ՎԱՐՉԱՊԵՏ

Ն. ՓԱՇԻՆՅԱՆ

Երևան

04.11.2024